

PROFESORA MARUJA FORERO CU DIEZ AÑA DI "NOTAS LITERARIAS"

ORANJESTAD (AAN) - Dia 19 di April awo, Profesora Maruja Forero Manrique ta cumpli diez aña di skirbi pa DIARIO, su columna "Notas Literarias", por cierto hopi gusta pa nos lectionan.

Con e idea a nace pa publica semanalmente e columna aki?. Maruja Forero ta contesta DIARIO lo siguiente: "E idea a nace door cu mi a pensa cu un columna asina tabata haci falta, pa motibo cu un di e Idiomanan cu ta ser papia na Aruba ta Spaño. Mi no si tin di haber cu e cercania di e Isla cu Venezuela y Colombia, pero ta masha importante mes".

Cual tabata e meta di "Notas Literarias?". "Mi ta kere cu Notas Literarias ta ocupa un

sitio importante dentro di e labor social cu mi ta bin ta realiza na Aruba, pasobra cu e notanan aki mi ta pretende di trese un mensahe positivo y ademas e ocasion di reflexiona un tiki riba hopi aspecto di interes general".

Notas Literarias ta di bo mesun inspiracion, of tin biaha bo ta usa algun literatura skirbi caba? "Generalmente e prosa ta product of di mi propio inspiracion, pero ora mi ta publica algun poesia mi ta pone e autor. Semper mi ta percura pa pone su nomber y tin biaha hasta su biografia.

Ora cu e letra ta di mi inspiracion ta di algun cantica cu mi a skirbi, pero no ta un poema sino un cancion, ya mi tambe ta compositor".



Bo a ricibi hopi reaccion durante e diez añanan aki di Notas Literarias?. Ken ta reacciona mas tanto, hende local of residentenan di afo? "Mi ta ricibi hopi reaccion, y di ambos banda. Di esnan di habla Hispana, y hopi biaha di hende local. Aunque mi no ta pone mi potret hunto cu e columna, casi tur dia mi ta topa cu hende cu ta reconoce mi mesora pa motibo cu, segun nan ta bisami, mi ta papia mescos cu mi ta skirbi. Nan ta

bisami cu nan ta colecciona mi columna di Notas Literarias, nan ta cortanan for di corant y ponenan den un album, pasobra nan a siña hopi di nan. No ta solamente hende adulto pero tambe mucha y hoben".

Kico ta nifica pa Maruja Forero skirbi Notas Literarias den DIARIO?. "E a yena mi bashi como Comunicador Social, ya cu mi ta Locutora Licenciada pa "Ministerio de Comunicaciones de Bogota, Colombia", den su prome categoria di Noticia.

Podise tambe pa e charla y conferencianan cu mi mester a dicta diariamente pa mi Alumnonan di Barchillerato, mi no tin problema pa por desaroya cualquier tema.

Mi ta sinti mi mes cu un compromiso grandi cu mi lectionan, y mi tin e satisfaccion enorme di ricibi reaccionnan hopi positivo".

Pa finaliza nos entrevista cu Profesora Maruja Forero, el a indica cu e ta spera cu e columna lo sigui asina lesa, y cu e tin hopi interes pa conoce e opinionnan di e lectionan na su P.O. Box 1134.